

दिनांक 06.09.2024

समय: 18.45 बजे

आकाशवाणी जयपुर-अजमेर
प्रादेशिक समाचार

- प्रधानमंत्री नरेन्द्र मोदी पाणी बचावण री कोशिशं मांय जनता री भागीदारी माथे जोर दीनो ।
- मुख्यमंत्री भजन लाल शर्मा कह्यो- राज्य सरकार गौवंश ने बचावण अर गौ पालकां री मदद सारू लगातार फैसला कर रही है ।
- प्रदेश मांय न्यारी-न्यारी ठौड़ां भारी बारिश-बीसलपुर बंधां रा चार दरूजा खोली ज्या-जयपुर, दौसा, टोंक, करौली, झुन्झुनू अर सवाईमाधोपुर जिला सारू ऑरेंज अलर्ट जारी ।

अर

- 'राइजिंग राजस्थान' ग्लोबल इन्वेस्टमेंट समिट 2024 मांय सिरकत करण बाबत निवेशकां ने न्यौतो देवण सारू मुख्यमंत्री री अगुवाई मांय एक दल दक्षिण कोरिया अर जापान रो दौरा करेला ।

000

प्रधानमंत्री नरेन्द्र मोदी पाणी बचावण री कोशिशं मांय जनता री भागीदारी माथे जोर दीनो है । वे गुजरात रा सूरत मांय **जल संचय जनभागीदारी** कार्यक्रम मांय आज वीडियो कॉन्फेस रे मार्फत बोल रहया हा । राज्यपाल कह्यो के आवती पीढ़ियां पाणी रा प्रति म्हाणा नज़रिया ऊं म्हाणो मूल्यांकन करेला ।

.....
प्रधानमंत्री कह्यो के पाणी बचावणो भारत री सांस्कृतिक चेतना रो अटूट हिस्सो रहयो है । केंद्रीय जल शक्ति मंत्री सी.आर पाटिल अर गुजरात रा मुख्यमंत्री भूपेन्द्र पटेल आखा गुजरात मांय चलायी जावण वाळी **जल संचय जन भागीदारी** पहल री सूरत ऊं सरुआत कीनी ।

00000

मुख्यमंत्री भजनलाल शर्मा कह्यो है के राज्य सरकार प्रदेश मांय गौवंश ने बचावण अर गौ पालकां री मदद सारू लगातार खास फैसला कर रही है । वे आज शाहपुरा जिला रा कोटडी मांय श्री सुरभि गौ-चिकित्सालय, गौ गृह अर आईटीआई भवन रो उद्घाटन करण अर सामुदायिक भवन अर किसान प्रशिक्षण सभागार ने और बड़ा बणावण रा काम री नींव रखण रे मौके राखी ज्या कार्यक्रम मांय बोल रहया हा । वे कह्यो के गोपाल क्रेडिट कार्ड योजना रे मार्फत सरकार गायां पाळबा वाळां सारू एक लाख रुपया ताई बिना ब्याज रो कर्ज देवण, पंजीकृत गौशालावां सारू अनुदान मांय 10 फीसदी री बधोतरी करण अर 100 गौशालावां ने रियायती मोल माथे गौ काष्ठ मशीन मुहैया करावण समेत न्यारा-न्यारा जतन कर रही है ।

वे भर्ती परीक्षा पेपरलीक मामलां रो जिक करता थकां कह्यो के ऐड़ा मामलां मांय एसआईटी हाल तांई 115 आरोपितां ने गिरफ्तार कर लीना है। मुख्यमंत्री कह्यो के नौजवानां रा सपना तोड़बा री कोशिश करण वाळां ने नी छोड़्या जावेला।

0000

प्रताप टूरिस्ट सर्किट सारु जनता रा नुमाइंदां, सामाजिक संगठनां अर जनता री राय ऊं कार्ययोजना बणायी जावेला। उप मुख्यमंत्री दियाकुमारी आज उदयपुर मांय महाराणा प्रताप टूरिस्ट सर्किट रा बारा मांय राख्यी ज्यी मीटिंग मांय आ जाणकारी दीनी।

वे कह्यो के राज्य सरकार प्रताप टूरिस्ट सर्किट सारु 100 करोड़ रूप्या रो बजट राख्यो है। दीया कुमारी कह्यो के टूरिस्ट सर्किट मांय धरोहर ने मूल रूप मांय संभाळ र सैलाणियां सारु सुबीतां मांय बधोतरी करी जावेला। ई पाछे उप मुख्यमंत्री राजसमंद जिला रा नाथद्वारा मांय खबरनवीसां सागे बातचीत करता थकां कह्यो के टूरिस्ट सर्किट मांय महाराणा प्रताप ऊं जुड़ी कुंभलगढ, दिवेर, हल्दी घाटी, चावंड अर चित्तौड़गढ सरीखी सगळी ठौडां ने शामिल करण री हर संभव कोशिश करी जावेला।

000

प्रदेश रा न्यारा-न्यारा जिलां मांय आज ई तेज बिरखा व्ही। अजमेर मांय संवारे 9 बज्यां ऊं व्हे रही बिरखा ऊं नीचला हलकां मांय पाणी भर ग्यो। टोंक मांय ई आज दोपहरां पाछे व्ही तेज बारिश ऊं जिंदगी माथे घणो असर पड़्यो। जिला रो मोटो बीसलपुर बंधो ई भर ग्यो है ज्यी पाछे आज इण रा चार दरुजा खोल र बत्तो पाणी निकाळ्यो जा रह्यो है। जोधपुर जिला मांय केई ठौडां आज ई बिरखा व्ही। जिला मांय बिलाडा रा जसवंत सागर बंधा मांय लगातार पाणी आ रह्यो है। भीलवाड़ा जिला मांय ई आज आखा दिन मेह बरस्यो। जिला रा नदी नाळा मांय लगातार पाणी आ रह्यो है। राजसमंद जिला मांय कामलीघाट कने विरमगुड़ा मोड़ परां बरसाती नाळा मांय एक कार बह ग्यी। कार मांय सवार चार जणां ने पुलिस अर गांव वाळा मिल र हिफाजत सागे निकाळ लीना। मौसम विभाग रे मुजब प्रदेश रा घणखर हलकां मांय आवता 3-4 दिन तांई चौमासा री बिरखा चालती रेहवण रा आसार है। मौसम केंद्र जयपुर रे मुजब आज अर काल उदयपुर, अजमेर अर जयपुर संभाग रा कुछ हलकां मांय भारी अर घणी भारी बारिश रा आसार है। जोधपुर, बीकानेर, भरतपुर अर कोटा संभाग रा कुछ हलकां मांय ई बिरखा री संभावना है।

0000

मुख्यमंत्री भजन लाल शर्मा री अगुवाई मांय राज्य रो एक दल 9 ऊं 14 सितंबर तांई अंतरराष्ट्रीय निवेशकां सागे मुलाकात करण बाबत् दक्षिण कोरिया अर जापान रो दौरा करेला। दिसंबर महीना मांय राख्यी जावण वाळी 'राइजिंग राजस्थान' ग्लोबल इन्वेस्टमेंट समिट 2024 सारु ओ प्रतिनिधिमंडल प्रदेश रा न्यारा-न्यारा हलकां मांय निवेश करण सारु न्यौतो देवेला। ओ दल जापान री राजधानी टोकियो मांय राख्या जावण वाळा 'नीमराना दिवस' समारोह मांय ई सिरकत करेला। अलवर जिला रा नीमराना मांय एक जापानी औद्योगिक हलको ई है, जिण मांय जापान री केई कंपनियां काम करे है। दक्षिण कोरिया अर जापान रा ई दौरा रा तैत मुख्यमंत्री बुनियादी ढांचा विकास, स्टील, ऑटोमोटिव, अक्षय ऊर्जा, इलेक्ट्रॉनिक्स, भारी उद्योग अर शिक्षा रा हलका मांय केई कंपनियां रा अहलकारां सागे बातचीत कर र वां ने प्रदेश मांय निवेश सारु न्यौतो देवेला। ई दल मांय उपमुख्यमंत्री डॉ. प्रेम चंद बैरवा, अतिरिक्त मुख्य सचिव शिखर अग्रवाल, उद्योग अर वाणिज्य विभाग रा प्रमुख शासन सचिव अजिताभ शर्मा अर रीको अर बीआईपी रा आला अहलकार शामिल है। जापान अर दक्षिण कोरिया मांय निवेशकां सागे बातचीत रे दौरान राजस्थान मांय निवेश सारु बुनियादी ढांचा विकास, सैर-सपाटा, खाद्य प्रसंस्करण, शिक्षा, रसायन, इलेक्ट्रॉनिक सिस्टम अर डिजाइन अर मैन्यूफैक्चरिंग हलकां माथे खास ध्यान दियो जावेला। दल रो जापान मांय राजस्थान रा प्रवासियां सागे मुलाकात करण अर सामुदायिक कार्यक्रमां मांय ई सिरकत करण रो कार्यक्रम है।

00000

काल गणेश चौथ रो पर्व मनायो जावेला। ई मौके गणेश जी रा न्यारा-न्यारा मिंदरां मांय 10 दिन तांई चालण वाळा खास अनुष्ठान सरू व्हेला। ई मौके गणेश मिन्दरां मांय सोहवणी सजावट करीज्यी है अर झांकियां सजाई ज्यी है। सवाईमाधोपुर जिला रा जूना त्रिनैत्र गणेश मिन्दर मांय मोटी तादाद मांय जातरू पूग रह्या है। म्हाणा सवाईमाधोपुर खबरनवीस बतायो के रणथम्भौर त्रिनैत्र गणेश मिन्दर मांय तीन दिन रो मेळो भर रहयो है।

.....

गणेश चौथ रे मौके घर मांय गणेश जी री मूरत बिठावण सारू मोकळा लोग गणेश जी री मूर्तियां खरीद रह्या है। **डूंगरपुर** मांय एक पर्यावरण प्रेमी कलाकार गारा अर गाय रा गोबर ऊं गणेश जी री सोहवणी मूर्तियां बनायी है। गारा, दूध, गोबर अर गौमूत्र ऊं बनायी ज्यी ऐ मूर्तियां पर्यावरण, पाणी अर पाणी मांय रेहवण वाळा जीवां ने नुकसान नी पूगावे है। **पाली** मांय गणेश जी री मूर्तियां बिठावण सारू पाणी ऊं बचाव करण वाळा खास पंडाल बनायी ज्या है। राज्यपाल हरिभाऊ किशनराव बागडे गणेश चौथ रे मौके जनता ने शुभकामनावां दीनी है। वे भगवान गणेश जी ऊं देश- प्रदेश री बरकत अर खुशहाली री प्रार्थना कीनी।

00000